


Juan David Yrausquin a tuma retiro for di partido AVP



ORANJESTAD(AAN): Despues di algun luna cu el a retira como Minister di Finanzas di Gabinete Mike Eman II, recientemente e politico a manda un carta na lider di partido Mike Eman, den cual e ta tuma su retiro completo for di partido. Cu esaki ta bira mas cla cu Juan David Yrausquin no ta comparti e vision di e partido mas. Fuentenan cerca di dje ta insisti cu Yrausquin a retira di AVP pero no di politica!

Den politica a nota su interes for di algun aña pasa caba, tanto tempo cu e tabata den negoshi como tambe despues den su funcion di Presidente di ATIA. Ey el a gana mas experiencia den politica local, debati y dialoga cu Gobierno y logra acuerdonan concreto. Sinembargo, tabata bisto cu e relacion cu Gobierno e tempo ey, entre aña 2001 pa 2009 no tabata mucho bon. Dialogo Social no tabata un plataforma conoci.

Na aña 2009, Juan David Yrausquin a tuma su retiro como Director di R.E. Yrausquin & Sons y a integra den politica activo. Durante su prome eleccion caba, campaiando primordialmente den e distrito di Noord, pero cu un vision pa henter nos isla, el a logra drenta Parlamento cu votonan preferencial di no menos di 1293 voto. Su forma di hiba campaña tabata peculiar y apart, pasobra el a bisa mesora cu si e haya e confiansa di votadonan, cu e lo bira un Parlamentario critico. Esey ta diferente cu tur otro politico, cu tradicionalmente ta bay pa bira Minister.

Juan David Yrausquin tabata hopi activo den Parlamento durante 4 aña largo, a pasa varios amienda, a bin cu mocionnan, a mostra un postura critico, hasta contra e mesun Gobierno na mando. Tabatin ocasionnan na unda hasta el a vota contra un ley, contra un mocion y hasta un biaha contra di e presupuesto! Durante e ultimo eleccion, na september 2013, Juan David Yrausquin a subi den posicion riba e lista di AVP. Di number 29 cu el a bay e prome biaha, el a bay pa number 9. El a bolbe haya aceptacion di su votadonan. Aunke cu un crecimiento marginal di apenas 21 voto, e

hoben politico a logra un biaha mas di wordo eligi cu votonan preferencial di 1314 voto.

Por conclui cu su estilo diferente di hiba politica a haya sosten, pasobra por lo menos e no a bay atras. Pero e hecho cu e no a bay hopi padilanti tambe por ta un mensahe cu votadonan di Aruba kisas no ta completamente cla ni prepara pa e forma diferente aki di hiba politica. Claro cu lo tin diferente forma pa interpreta e resultado.

Después di eleccion, a apunta Juan David Yrausquin como Minister di Finansa. El a huramenta na fin di October 2013 pero a retira 4 di Juli 2014 un dia despues cu Prome Minister di Aruba y di Hulanda conhuntamente cu Minister di Relacionnan di Reino a yega na un acuerdo riba maneho financiero di Aruba. Su retiro tambe e tempo ey a laga espacio pa intepreta su decision como un desaprobacion contra Hulanda of contra su mesun Gobierno local. Riba e dia ey el a bisa cu el a baha pasobra e no ta dispuesto pa carga responsabilidad financiero di nos pais si e no tin e autoridad cu ta compana e responsabilidad aki.

A scucha hopi opcion despues, sea e lo sigui traha como consehero di Minister di Finanzas, of como consehero di Gobierno completo, of den e Fiscal Council of hasta cu e lo por maneha un instituto nobo, Centraal Plan Bureau. Ta conoci cu e lo a ricibi diferente oferta pa traha den sector publico como tambe sector priva. Nada di esaki no a sosodé, al contrario, el a dicidi di distancia su mes awor completamente di partido AVP.

Fuentenan yega na dje a bisa cu e tin interes pa sigui profundiza su mes den ramo di sector publico pa despues continua den politica. Den cua partido no ta mucho cla ainda, pero cu e kier sigui aporta na su pais ta keda su mision den bida.

Dentro di poco e lo bandona Aruba pa sigui su estudio den exterior. Asina e cla, e lo yega net na ora pa e siguiente eleccion. Juan David Yrausquin tin 35 aña di edad, ta casa di Amy Yrausquin-Roos y tin tres yiu.